

石
琴
廬
叢
刊

王
文
如



作廢

第二種



石焚園焚取

王允之署檢



石琴廬日錄摘牘序

弱冠冰氈轉徙孤學無儔日知所無恆用自課巾箱所積
冊與年增庚子之亂家傍戰場拾燼劫餘已無片錄近檢
舊篋僅得壬寅癸卯日記兩冊廿載陳編如逢故我雖稗
義秕詞無裨道要而因事察理惟日孜孜倘亦學圃中之
竹頭木屑歟噫嘻白髮盈巔歲月其邁青氈回首往事如
烟當年困學之心猶得於故紙叢殘中窺見一二故劍之
思其能已乎摘而存之固非以享敝帚也

中華民國十有四年夏正二月瀋陽張之漢

石琴廬叢刊之二

瀋陽張之漢仙舫著

日錄摘賸

天賦人以義理之性又賦人以氣質之性畀人以道心又
畀人以人心非天故與人以雜不與人以純也純雜之機
操之人不操之天也帝王之教化聖賢之學問人也非天
也所以補天之不足也

人無自怨自艾自愧自奮之心而欲其事機之轉不能也
時時怨天則天不許事事尤人則人不許

欲有爲者宜常存整齊振奮之神氣顏神渙安能濟事

出言如用錢得省一文便省一文得省一句便省一句

晉接之間示人以樂易不若示人溫恭與人以可狎不若
與人以可敬

處人處事宜持之以有心而出之以無心有心則幾微必
察無心則痕迹胥泯二者交相濟

一味渾含羣疑百忌舉處於無權一味觝拒諸姦百詐羣
起而競勝以巧制巧不若以拙以動制動不若以靜

人有不及可以情恕非意相干可以理遣本此四語以接物免去多少愠怒釋却多少怨尤

精神每有照顧不到處豈是理煩治鉅之材溯其病根多由妄疲心力於無用之處泊乎應事接物精神已如强弩之末安能無失古人寶嗇精神正爲擔當事務也

多欲多累多欲多費故養心節用之道必以寡欲爲先器識不足者難與持正義器量不足者難與成大事盲瞽步蠶叢欲不失足難矣鼯鼠吸滄海欲不裂腹難矣

觀人器量勿於其他但視其人常有悻悻之色戚戚之容則器小量狹可知矣

黃憲汪汪如萬頃之波澄之不清擾之不濁高允在位四十年未嘗見喜愠之色二公之度量何以至此余常寤寐求之

士重氣節但求無屈於己不必求伸於人矜而爭矜也忿戾皆坐求伸於人耳漢延熹明東林黨禍之興有由然矣人面有污點則喜人告之身有污行則不喜人告之面有

污點人告則拭之身有污行人告則護之何但欲潔其面而不欲潔其身耶弗思甚已

遇有拂逆即須排遣而消釋之藏怒宿怨譬如種毒既害裕德尤礙衛生

鄙人量小便是己之量小忿人氣乖便是己之氣乖

人前炫長大是惡道况炫於好矜其長者之前召爭招忌又豈能免

察言觀色乃是證已得失非是隨人俯仰吾儒出身涉世

不可無此工夫

偷兒忌月嫫母憎鏡光明睿智之士每不見容於奸邪小人之側者大率以此

聖人學於萬物先民詢於芻蕘虛受之量莫窺涯際小儒自是己是藐視等輩一得自矜恥於下問以視虛受之量奚啻滄海轔滄

人無論剛柔智愚但氣不能平便難作大事便難得衆心蓋氣一不平則察理用情均不得其平矣節南山之詩云

赫赫師尹不平謂何

以責人之心責己則過自寡以恕己之心恕人則怨自遠
一轉移間便成妙道但其間却有一字之障不易打通障
維何曰私

論語言君子和而不同中庸言君子和而不流有子明禮
之用和爲貴而申之曰知和而和不以禮節之亦不可行
孟子稱柳下惠聖之和而揭之曰不以三公易其介聖賢
於和之眞辨之如此其至也和之弊防之如此其嚴也世

猶有逐物失已以爲和者

和之理本乎巽巽行必濟以艮止和之氣本乎春春溫必濟以秋肅和之情本乎仁仁育必濟以義正五行之化相承相制五常之德相反相成天之宣化人之成德妙用全在於斯若於天下名理祇見得一邊便偏倚作去未有不滋流弊者不僅和而流一也

學者有一美德必有一相似者依附以亂真更有一相反者牽掣以爲敵亂真若何矜而爭羣而黨周而比和而同

辨之不明則畫虎類犬矣此學於問思之後貴有明辨之
功爲敵若何縱敗度慾敗禮小害大淫破義行之不篤則
蓄莠鋤苗矣此學問思辨之後貴有篤行之力

性分之得失宜存捧壁失手之懼勢分之得失宜有破甑
不顧之懷

我以不平召不平不得怪世路之險巇我以不情召不情
不得怪人心之乖張吾觀世人日以不平之氣不情之舉
求逞於人而造成滿途荆棘卒致地步日窄舉足皆難惜

乎其不悟也

任氣者難遽以理折須先平其氣任性者難遽以禮繩須徐移其性爭之太急操之太蹙必致潰防破隄而不可制因勢利導使順其則大禹治水之道正可師以治人

事物之有情理猶竹木之有文理也析木破竹順其文理迎刃而立解逆其文理鋒摧而無功夫以斧斤之銛利求伸於竹木逆其文理尙招摧折况人與人相接乃不順情理以施之豈能一往無阻乎

窮達命也勿專委命行止數也勿專任數必在我質直而
好義察言而觀色慮以下人已盡其道而猶不達乃可言
命必在我言忠信行篤敬參前倚衡已盡其誠而猶不行
乃可言數在已有一分未盡便是自阻其達自尼其行於
天何與乎於命數何尤乎

石壓筍斜出巖懸樹倒生筍直出樹上生本然之性也而
斜而倒所託之非其地也士君子欲遂其本然之性以伸
其挺然之節可不擇所託乎

有隱惡者惡聞報應有凶德者惡聞刑律有邪行者惡聞箴銘衆中發論不可不慎

心平者氣自和氣靜者言自寡言簡者神自斂神安者容自端容恪者意自沈意精者理自定理洽者心自平

萬其事萬其理事各一理理各一當車只宜陸舟只宜水葛只宜夏裘只宜冬不相假也參互用之欲得其通適得其窒欲得其中適得其偏

問事可前知乎理可先見乎吉凶禍福可豫決乎曰可惠

迪吉從逆凶滿招損謙受益善降祥否降殃如是而已捨此以言則讖緯之說符籙之學儒者弗道

不干已事勿僥言不干已言勿逞辨

喜時一檢點怒時一檢點忙時一檢點誼時一檢點

張南軒曰易君子以遠小人而嚴所謂嚴者嚴其在
我而已

東漢黨禍之興大抵起於好名欲立高名必發高議譏訕
時流臧否人物危言激論結怨姦尤欲免於禍豈可得乎